

筆記小說大觀集

宋張舜民撰
畫墁集 全

進步書局校印

書
長
集

卷
之
一

宋張舜民撰

畫
墁
集

上海進步書局印行

畫墁錄提要

宋張舜民撰一卷舜民著詩文名畫墁集語本孟子謂畫地而復墁滅之無用之謂也書名取義本此是錄亦以畫墁為名於新唐書五代史頗肆詆謔見智見仁無足怪也所載宋時禠事間或鄰於瑣屑然一時掌故頗有藉是以考見者存廣見聞固無不可也

畫墁集卷一

宋 邠州張舜民芸叟撰

詩

紫騮馬

紫騮馬。白面郎。紅銀鞍勒青油韁。左牽黃犬右擎蒼。朝從灞陵獵。莫宿投平康。使酒
不滿意。按劍叱天狼。今年明年一如此。後年不覺髮成霜。扶肩策杖出門行。抱子弄
孫樓上坐。忽然涕淚滿衣襟。為見驂騮面前過。

關山月

明月生海上。裴回照邊城。中夜關山靜。但聞流水聲。征人看月思鄉泣。夜久衣單難
獨立。錦字佳人怨不歸。開幃更感飛螢入。

桃李花

紅白桃李花。馨香滿芳草。開時人少年。落處人已老。風雨半夜來。飄揚滿官道。行客
為歎息。不忍便除掃。猶有兩三枝。香色晚更好。把酒將奈何。攀折恨不早。

二

花如桃李人如玉。終日看花看不足。萬年枝上轉春風。七絲絃上調新曲。寶馬嘶風車擊轂。東市鬪雞西市鞠。但得長留臉上紅。莫辭貴買尊中醕。

來日大難

去日滔滔似易得。來日藐藐若大難。一日且作一日調。百年莫作百年看。晉侯竟爾見新麥。楚王更要食熊蹯。勿輕白髮翁。勿恃青楊質。物壯則老矣。其壽不可必。嵇叔夜。郭景純。今般人物如何人。皇天何不留逡巡。

君馬黃

君馬良。乘乘黃。僕臣御。守法度。乍可三驅失前禽。不可一朝為說遇。假使四牡項領。無害六轡如組。周旋中規。折旋中矩。聽和鸞之聲。遵康莊之路。馬不駭輿。君子安處。如欲登九折之險。走羊腸之阻。蒙犯霜露。跌盪風雨。雖使造父再生。王良復出。予亦未知其如何爾。

大雪行

曉辭洛水濱。暮宿河之涘。四野漫漫不見人。竟日止能行數里。渾然天地為一色。渭水南北復何似。五陵鷹犬爭合圍。十宅管絃初熱耳。連宵耿耿照鬢髮。迎馬點衣猶

未已。但得來年春麥熟。暫困泥塗復何恥。農夫南畝未厭多。卻入長安作泥滓。

邯鄲少年

邯鄲全盛時。人物自都雅。更得幽并兒。豪氣陰相假。生求趙王劍。千金不論價。力購燕國姝。臨高起亭榭。使酒叢臺上。夜獵西陵下。聞說五陵兒。臂鷹馳犬馬。

試院感懷

朱戶當畫角。霜簾達夜懸。沈沈造廣庭。皦皦接衆賢。疎筵叩洪鐘。短綆汲深淵。始知學不迨。力顧多慊然。憶昔居上庠。忝出流輩前。賦就千金直。詩成萬口傳。荀揚迴接迹。班馬思比肩。一從荀子祿。永謝英俊躔。折腰府縣中。餬口道路邊。世俗多見輕。義士誰哀憐。惟悴有今日。光輝思昔年。今茲覩秋闈。猶欲爭相先。枯魚傍江湖。疲馬憶剡燕。涼風拂翠幙。隴月向人圓。物景近中秋。客意孤綿綿。裴回望清光。欲攬不得全。永懷懽樂時。把酒謝嬋娟。

鯨魚

東海十日風。巨浪碎山谷。長鯨跨十尋。宛轉在平陸。雷火從天來。蒼然剝兩目。肌膚煮作油。骨節分爲屋。腥羶百里內。戶戶至厭足。我聞海上人。明珠可作燭。鯨魚復何

罪。海若一何酷。從欲讒風伯。大鈞問不告。躊躇復歎息。歸咎當溟瀆。託形天地間。獨爾有含蓄。大者不能容。小者又何益。卻羨蝦魚輩。安然保家族。

東武二首

小白獎周室。夷吾致其君。各竭當時力。未免後儒言。駿馬日千里。壯士舉百鈞。更欲加勉策。折髀與推轅。

景公登牛山。俯闕臨邑區。耕耘被廣野。軒冕充脩衢。鬪難走狗馬。擊筑吹笙竽。魚鹽來海岱。桑柘入青徐。饒樂曾無敵。棄背復何如。公乃歎而泣。顧謂諸大夫。安得千萬年。長有此國都。大夫助公泣。獻壽猶欷歔。晏子歛袂笑。笑此君臣愚。世事如輪環。曾不借須臾。前此十數公。今已成丘墟。胡不長守此。乃與子孫居。始知富貴者。喜受庸人譏。豈獨當時笑。後世亦揶揄。

山陽二首

山陽水陸衝。藥餌人所赴。寂寞先生門。車輪不少駐。賢哉彼二公。綽有尚賢風。恨不生羽翼。嘯歌樽酒中。

古人急於仕。每擇分所安。願為趙魏老。不作滕薛官。今人不量力。臨老當繁難。少見

詠淇澳甚多歌伐檀。

淮口阻雨己亥吳同年要飲舟次淮口作

旱久不得雨。既雨不肯休。汙汙汙河水。初合淮河流。北來何處客。暫此駐扁舟。中有投荒人。萬里趨炎洲。聽水夜不眠。觀水朝亦愁。呼風捲重陰。放出赤日頭。捨舟出平地。走馬復西遊。

天爵山

耕者志於食。否則餒繼之。學者志於道。一為好爵縻。本自不營利。閒或與利期。朝日入而處。暮日仰而思。浮雲蔽部屋。見前當自知。

李侯新齋植松竹聊為雜言

嘗聞君子居。一日顧必葺。李侯作新齋。制度皆自給。軒楹如肺腑。豁達可出入。取竹渭水濱。移松隴山隰。歲寒遠相依。勁節久孤立。栽培豈無法。根著至今漚。清風在目。前獨我得多挹。歸壤共無涯。往日不可及。惟憂屬後人。長伴邊聲急。

送葉仲出使河北

君今使河北。幾日渡黃河。脫身出臺省。仗節犯風波。東南耆舊中。如若能幾何。何人把

袂留。顧我錢則那。燕趙多佳人。善舞體婆娑。不學白紵詞。能唱瓠子歌。歌罷令翁愁。井竈宅龜鼃。安得佐禹才。干旄飾五紘。與君並駕驅。坐使民氣和。揮汗強援筆。矢辭愧不多。

汧陽感事

人誰無婚姻。我則分鮮薄。即今頭已白。不識外家樂。再過汧陽縣。心境何寂寞。當時退食地。東軒俯層壑。華屋變山上。九原寧可作。空存遺愛樹。枝葉幾榮落。正如遼東歸。但見舊城郭。堂堂想其儀。物物皆如昨。眼看北來雁。身是南飛鵲。霜風掃隴麋。晚翠歛吳嶽。臨行更踟躕。灑淚徧南閣。

思善堂

春風長萬物。棘子猶卷然。及至華實稠。已悲霜露先。功隨四時去。不待三牲全。所以陟岵人。設身常捨旃。

鄉人言

郴江有奇石。似牛伏岸側。鄉人久相傳。過者有顛覆。我與鄉人謀。鑿去可勿留。祇消一日力。得弭千歲憂。鄉人顧我笑。官必有闡拙。大者不能圖。小者安能說。方今民間

事頗有急於石。當官貴居事。能不閑採拾。我家本多田。今乃身無居。雖有兒女輩。售人為婢奴。破家不足悵。所恨骨肉離。官今將骨肉。好去將何之。我雖有田里。亦聞官念此。念此不能為。何用居官爾。乃指江中石。此物如有神。不覆廉善士。獨傾貪虐人。官今幸過此。行李都無害。將我言日思。勿為貧賤懈。我聞鄉人言。背額俱汗流。欲問破家因。恐為明者羞。

送羅正之年兄出使二浙

玉塵助清談。金貂飾高位。二物已殺身。無剝生民利。君為使者官。猶作農夫事。隨軒載畚插。一心惟度地。惟梁及齊岱。潢汙變滯穗。玉食反無魚。黃牛如象貴。凡人畏辛苦。君處乃樂易。富哉太伯墟。吳越之委積。二年苦昏墊。龜白成蛙肆。一日死百人。官司但熟視。不獲乃命君。物議已為遲。君其尚勉旃。副彼朝廷意。若為濬涇洪。可得露城市。誅其姑息人。戢彼因循吏。死者不可招。存者如何置。赴海與壑鄰。實繫君之智。君家本天台。立身頗勤勤。一生在州縣。晚歲稱憲使。南人重衣錦。今爾實自致。弭節拜墳墓。椎牛設鄉遂。翁媼上籬觀。揮零復嗟喟。咸曰羅家兒。今日乃如是。伊予出西北。仕路每相值。交代又同年。莫予論事契。嗜好無不同。出處亦有類。天台與四明。一生

游夢寐。淡蕩春風中。都門把歸袂。行與興公游。閒過賀老醉。二客儻有言。因風幸相寄。

送薛昌朝赴太原幕府

去國重為客。送君還復歸。天寒雨細光景促。且就東城寺中宿。寺當蒲坂望屋廬。日暮無由辨喬木。既已唯諾難自由。雖欲一日安可留。吾輩事勢不大殊。此際興味復何如。歸來愁坐獨嗟吁。畢竟豈如村野老。或爾富民城郭居。雨暘寒燠都不與。親戚滿眼身不孤。乃知平生走薄宦。正似癡牛引重車。險夷繚絡不知止。祇得終年困道塗。

贈奉議沈遼

鳬脰天生短。鶴脰本來長。一朝有客欲斷續。二物無地逃悲傷。吾徒曾匪鳬鶴匹。又取聖賢為學術。解將軒冕等浮雲。寧免儻來并執一。夫君擢秀居東南。代以文詞起簪紱。鈿鈿官業素有聞。更號能書居第一。平生意氣少防閑。一跌落在江湖間。幾年轉徙無家室。惟與漁樵為往還。醉吟未免寫胸臆。健筆依舊飛雲烟。遠俗僻陋多不識。都城一帖沽萬錢。今朝我過齊山下。邀我陟降遊二山。羨君卜築思意盡。今古氣象羅目前。佛留九頂千株石。天賜清溪一水灣。自拾薪枝給朝夕。不與城郭通交關。

親友一切皆謝絕。惟許子馳來問安。人生涉世多憂喜。不用昭昭明物理。少小辛苦
卜一廬。如今老大無居止。還流方從五嶺去。敢望生還復經此。萬一君恩縱北歸。與
君左右為鄰里。

還李穀士雄卷

河汾之會。韓晉之津。在昔王馬。今何人。青衫木笏排風塵。面如桃花髭如銀。長篇大
字妙入神。關輔後輩誰等倫。四方仕宦足遘連。歸老闕鄉玉澗濱。雲為友兮山為鄰。
森森綠槩萬霜筠。汨汨清漣飛兩輪。亭上何所見。荆山早暮來相親。齋中何所有。新
舊歌詩千百首。細大搜羅萬象勞。放開日月東西走。世上兒女徒紛紛。作者須教歸
老手。君不見古往今來富貴人。燦燦金章懸紫綬。金珠初入寵方深。骨肉未消名已
朽。又不見李杜死來三百年。至今仰望如星斗。一聯一句挂齒牙。便同金石垂長久。
乃知皇天造萬物。獨於吾輩偏加厚。還翁詩卷翁細思。豈是生平都不偶。

禪僧福公寄惠牧牛圖答以問牛歌

訶訶訶。棲巖老法師。寄我牧牛頌。我是人間百歲人。今朝卻作嬰兒弄。堪笑其間有一
牛。滿身變白尾猶黑。想君不是上上根。教人費盡閒心力。我昔有一牛。其毛元自白。

如今牛已無。欲求不可得。蓑笠與鞭繩。同時皆棄擲。身心無住著。冷坐溪邊石。卻問
山中人。閒尋牧牛客。

書節孝先生事實於先生詩編之後

古人往矣名空存。爾來冠帶誰其倫。語言淵濤行盜跖。俯仰不愧何續續。先生道義
完且潔。去彼取此非今人。事親豈但綵衣戲。刻木省定長悲辛。抱官卻掃醉經史。胸
中無復留纖塵。履穿袍敝笑不墨。辭幣與粟甘清貧。自從秀髮到白首。造次於是非
一晨。當知有昊憫澆散。先生故出拔斯民。嗟余稟賦雖不敏。管窺偶幸知所因。講聞
先生亦已久。云為輒以書諸紳。竭來廣陵兩閱歲。所得比舊尤加親。此編雅什盈數
百。覃思成誦驚余神。恍如聽樂周太廟。黃鐘大呂饒且純。又如典瑞出圭璧。璀璨溢
目非珉珉。偉哉固足信萬一。髣髴想見容彬彬。吾皇圖治急遺逸。空谷相望推蒲輪。
先生高臥焉得遂。細札匪日頒嚴闥。重慙韁鎖脫無計。灑掃猶阻致此身。願言師法
不少懈。異日有立逃湮淪。

跋百之詩畫

詩是無形畫。畫是有形詩。丹青不知老將至。李陵蘇武真吾師。太平本學治禮樂。猶

有暇日能臨池。區中孰最奇。龐眉皓首苟住著。安得一區我安之。

京兆安汾叟。赴辟臨洮幕府南。舒季君自畫陽關圖。并詩以送行。浮休居士為繼其後。

古人送行贈以言。李君送行兼以畫。自寫陽關萬里情。奉送安西從辟者。澄心古紙白如銀。筆墨清輕意蕭灑。短亭離筵列歌舞。亭下諠諠簇車馬。溪邊一叟靜垂綸。橋畔俄逢兩負薪。掣臂蒼鷹隨獵犬。聳耳駝驢扶隻輪。長安陌上多豪俠。正值春風二三月。分明朝雨泥輕塵。客舍青青柳色新。主人舉杯苦勸客。道是西征無故人。殷勤一曲歌未闕。歌者背淚沾羅巾。酒闌童僕各辭親。結束韜韜意氣振。稚子牽衣老人哭。道上行客皆酸辛。惟有溪邊釣魚叟。寂寞投竿如不聞。李君此畫何容易。畫出漁樵有深意。為道世間離別人。若箇不因名與利。紅蓮幕府盡奇才。家近南山紫翠堆。烜赫朱門當巷陌。潺潺流水遶亭臺。當軒怪石人稀見。夾道長松手自栽。靜鎖園林鶯對語。密穿堂戶燕驚迴。試問主翁在何所。近向安西幕府開。歌舞教成頭已白。功名未立老相催。西山東國不我與。造父王良安在哉。已卜買田箕嶺下。更看築室潁河隈。憑君傳語王摩詰。畫箇陶潛歸去來。

打麥

打麥打麥。彭彭魄魄。聲在山南。應山北。四月太陽出東北。纔離海嶠。麥尚青。轉到天
心。麥已熟。鷓鴣且催人。夜不眠。竹雞叫。雨雲如墨。大婦腰鎌出。小婦具筐逐。上壠先將
青。下壠已成束。田家以苦乃為樂。敢憚頭枯面焦黑。貴人薦廟已嘗新。酒醴雍容會
所親。曲終厭飲勞童僕。豈信田家未入脣。盡將精好輸公賦。次把升斗求市人。麥秋
正急。又秧禾。豐歲自少凶歲多。田家辛苦可柰何。將此打麥詞。兼作插禾歌。

畫墁集卷二

宋 邵州張舜民芸叟撰

詩

梅子

月破冥冥雨。枝搖閃閃黃。口中先水出。衣上帶花香。肺疾須拚醉。牙疎不耐嘗。調羹無復用。山谷自傾筐。

巖花

托根何太遠。得地亦相宜。土石生為偶。紅香想自知。風英將片片。雨實漸離離。成客思攀折。無何歷處危。

訂齋獨坐懷兄弟

並橋冰乍泮。隔岸柳初黃。河上春猶淺。天涯日漸長。平時好行樂。往事入思量。最恨三年別。應添兩鬢霜。

東行別訂齋

宴坐豈不好。有誰強爾行。山川不改色。兒女若為情。岸隔霜林意。齋空夜水聲。虛傳